

【心色个童年】黃美貞原作

還細時節，細人仔無科技產品做得爽；毋過，屋簷下、杌仔樹、伯公下、大圳溝、竹林，做下都係佢這兜个遊戲場。

佢這兜四姊妹，加上隔壁鄰舍个細孺仔，輒常湊等份家啦、爽紙擲仔<sup>1</sup>、園人尋等等，係堵到毋使讀書个下晝頭，定著爽到斷烏，等到大人擊等竹修仔來尋細人仔，大家脛著毋像勢正溜瀉。

好天好時，佢這兜七好在圳溝肚覓蜆仔。有一擺，沙鼻个老弟啞啞滾，打賭佢捉得著細蝦公，上屋个阿賢好擲擲仔應：「該愛仰般賭？」老弟誚難<sup>2</sup>佢：「你係捉到比佢多，今暗晡佢請你食夜。」阿賢堪毋得人激，應講：「好！無問題！」該下晝，佢兜先攔水窟，想撈蝦公錫到水窟肚，毋過，細蝦公哪有恁該捉，兩下半蝦公就躍走了，佢這兜試著無意思，早就走淨淨。無想著佢兩儕毋服輸，目珠眨都無眨，搵到歸身潦潦、扃扃糟糟合泥了了，水窟肚淨兩三尾細魚仔定定，等到暗摸胥疏，無結無煞正遽遽轉屋，管佢麼人輸贏？係還毋轉屋，毋單淨無飯好食，還會賺

<sup>1</sup> 紙擲仔：音 zhi` piag er`；紙牌，指孩童時期玩的圓形紙牌，圖案多為卡通人物或電視、電影劇中人物。

<sup>2</sup> 誚難：音 shau` nad`；嘲笑譏刺。

一陣皮疾。

又有一日，翕燒个下晝頭，佢兜兄弟姊妹在屋下四圍爽園人尋。老弟係爽頭王，哪位都尋得著來園，爽幾下輪乜爽毋煞棚。無想著坐在屋簷下个阿嬤大聲喊：「遽遽轉來！莫在該頭牛眼樹下爽，該位盡多草鞋嫲<sup>3</sup>哦！」頭擺个細人仔輒常打赤腳爽到毋知頭天，樂線樂線个佢這兜，無膠阿嬤个話聽入耳，結果做鬼捉人个老妹突然間脛著該生到烏疏疏，有十過公分長个虐毛蟲，對等佢趁等過，嚇到尾瀉屎走都走毋掣！嘎「哇——」聲嘍出來，嶄然好爽个老弟，興蹠蹠仔行兼想逐該尾草鞋嫲，阿嬤闕粹粹仔<sup>4</sup>咄：「你係分佢趁到臉身，該斯會像貓拖糞粑——難殿爪<sup>5</sup>哦！」

「良言莫嫌少，朋友莫嫌多。」還細時節跣等同學伴、隔壁鄰舍个細孺仔弛崗打陣，滿哪仔都係佢這兜共下行過个腳跡、脛過个景色、爽過个心色事，係佢這兜細人仔最懷念个童年，該兜心色个回憶膠畫面，永久都會留在佢个腦格肚。

<sup>3</sup> 草鞋嫲：音 co` he ma；攀附在樹枝上全身長滿毛刺的毒毛蟲。

<sup>4</sup> 闕粹粹仔：音 ad` cud cud er`；氣呼呼的。

<sup>5</sup> 殿爪：音 lud` zau`；本指爪子脫落，後亦借指人脫離困境或陷阱。此指像貓爪抓到麻糬一樣，難以脫身。

111 年全國語文競賽客家語朗讀文章國小學生組（饒平腔）

編號 2 號

【敬祖公】李雪菱原作

這擺五月節，阿爸帶佢兜轉伙房肚去敬祖公，有當多牲儀擺在神桌頂，算算啊有五六十付。叔公講：「係講過年又會較多，戴外背个會轉來，有七八十付恁多。」輪著點香个阿亮叔比手畫腳<sup>1</sup>，指揮大家人摺牲體擺好勢。除忒三牲、五燥以外，佢兜正身伙房个子孫還會另外準備五碗炒好个齋菜，阿嬪摺佢兜講係因為公太食齋，阿公講：「這就係五燥五溼。」佢暝有柿花、牛眼乾、麻糍米糍、冬瓜糖、地豆糖，還有炒好个香菇、木米、金簪、筍乾、冬粉這兜，佢心肝肚想：「到底係公太愛食？還係佢兜好食？」

酒滃好、神請煞，大家人開始打嘴鼓，該片伯公講起頭擺戴在伙房，伙房分上片、正身、下片，敬祖宗个時節有當多人。時代變了，伙房戴毋落，後生仔搬出去落戶，這下淨伸三四十戶定，暝起來有兜落寞<sup>2</sup>，所以過年過節大家人愛轉來團圓。

這片細阿叔講：「頭擺下片阿木叔豬欄脣野生一頭杻仔，阿

葉哥會帶佢兜歸陣細狃仔去摘來食，係分阿木姆暝到，佢會提祛把來逐，佢兜都走到顧死命，毋知愛哪園正好，到這下想起還會發痴驚<sup>3</sup>。」大家聽到哈哈大笑。你一嘴、佢一句，笑聲滿廳下，實在有鬧熱。

這兜叔婆伯姆企在神桌脣，指等毋知哪家个雞仔，緊講畜到當靚，又緝到當燈線。細姆分大家人暝到面紅紅，又盡歡喜講係佢个。叔婆幹頭摺阿姊講：「你兜旨嫁个細妹仔來暝一下，左魚右肉雞中心，愛記得！莫擺毋著，正毋會分人講無教著。」

另外一片細後生仔企共下，手提等手機仔，畫來畫去，有時交頭接耳講一下，有時問愛仰般下載影片；還有人戴等耳機仔搖來搖去，一暝就知在該聽熱門音樂。外背禾埕一大陣細猴仔跔著阿弟牯走上走下，追來追去，毋知爽麼个遊戲？暝毋識喔！

阿亮叔喊：「滃酒、滃酒，銀紙愛先提便。」仰恁遽呢？嘴鼓都還旨講煞，全部人就去各家滃酒，一下仔無閒泊杈，左手交右手。三輪酒過後、燒銀紙、打紙炮。

鬧鬧熱熱个伙房，一籬鉢个心色事，較久都講毋忒，跔等酒香、紙炮聲傳出來，這就係幸福个香，這就係幸福个聲！

<sup>1</sup> 比手畫腳：音 bi` shiu` vag giog`；比手畫腳。

<sup>2</sup> 落寞：音 log mog；落魄、蕭條。

<sup>3</sup> 發痴驚：音 bod` chi` giang`；做惡夢。

111 年全國語文競賽客家語朗讀文章國小學生組（饒平腔）

編號 3 號

【姐公个紅棗細寶貝】劉純汝原作

記得佢略略仔知人我以來，逐年在翕熱个避暑，阿姆總係會渡佢轉姐公屋下，因為姐公戴在苗栗公館客家莊，種了一大片紅棗樹，七、八月緊工時節，屋下大細會總動員轉來搵手。

收成趕事个逐晨早，天甫甫仔光，姐公、姐嬭、阿舅摻姑婆總係帽子、手袖仔、長褲、水靴筒……全身包好勢，揸等大大細細个塑膠桶、布袋這兜，出發去園肚摘紅棗！見擺，佢總係睡過边跨毋著，就單淨在屋下搵手擇紅棗个份。十歲該年，分佢印象當深，打早還唔五點就輕輕仔跔起來，恬恬仔著好衫褲，在廳下等姐公佢兜。

姐嬭睭著佢著下驚：「啊喔！你這隻細孺仔，日頭都還在該睡，坐在這位做麼个呢？」

「分佢跨好無？」

姐嬭續等講：「徑手徑腳<sup>1</sup>就會，棗仔樹全笏了了<sup>2</sup>，係分佢刺著，會喊阿姆哀唷！大人無閒泊杈，斯無人會插你！」

顛倒最惜佢个姐公，笑笑仔講：「毋怕，分阿瑄跨，佢也盡

<sup>1</sup> 徑手徑腳：音 gang` shiu` gang` giog`；礙手礙腳。

<sup>2</sup> 笏了了：音 ned` liau` liau`；刺很多。

久無去紅棗園了，共下來睭姐公个紅棗細寶貝哦！」

「新娘上轎，頭一擺」分佢跨著了！一落到園肚，佢像飛出鳥籠个鳥仔，暢到奈毋得，緊行緊摘、緊食緊行！哇！串串啾紅大粒、亮線飽滿；咦！佢聽著樹頂絡食个細鳥仔啾啾滾<sup>3</sup>呢，鬧熱煎煎唛無停，唱出一條條好聽个歌仔；嘢<sup>4</sup>！細樹極背仰會困等恁心色个虐毛蟲呢？在該蠕蠕動像跳舞樣；該——還有當多毋識睭過个細蟲仔，滿哪仔趁來趁去爽困人尋。「你兜愛細義啊，毋好分棗仔笏刺著了！」睭到全無矚目个佢，好心摻佢兜提醒，噯毋記得係來搵手个啲！

識得過「紅棗王」个姐公，紅棗係佢个細寶貝，一溜里來，花盡多心思照顧像滿子个佢兜，姐公長透講：「人勤地獻寶，人懶地生草。用心照步來做，就會打出品質湛斗个紅棗哩啲！」兩年前，姐公身體無鬆爽，既經無法度去園肚做事，現下个紅棗收成也差多了，細寶貝可能係日思夜想姐公，噯毋記得愛好好成長哩！

佢想摻姐公个紅棗細寶貝深深感謝，「係你兜串出姐公个歡喜農場，係你兜連起歸屋个幸福味緒，係你兜還分佢有暢樂个童年回憶」。這下佢兜共下來請求神明庇佑姐公，做得平平安安、康康健健哦。

<sup>3</sup> 啾啾滾：音 ziu ziu gun`；狀聲詞，形容鳥鳴聲。

<sup>4</sup> 嘢：音 ho`；語尾助詞，義同「喔」、「啊」。

111 年全國語文競賽客家語朗讀文章國小學生組（饒平腔）

編號 4 號

### 【一場有意義个活動】林惠美原作

學校附近有安養中心，有一擺，佢兜摺學校參詳想安排老人家來學校「行」寮，學校當決截<sup>1</sup>个應下來；為著這擺个活動，學校參詳兩隻班級來主辦、進行大部分个活動齣數<sup>2</sup>，學校先生認為佢个班級最倚恃得，所以就摺事先訪問、煮食、招待个活動分佢兜負責。

訪問單裡肚有七隻問題，係愛了解阿公、阿嬪好食麼个？想愛麼个？學校按算參考這資訊來設計活動摺準備東西。先生無希望佢兜提等單仔做紀錄，所以喊大家先摺問題記起來，先前安排「摺愛送入安養中心」个行程；飼忒點心，佢輕輕仔摺阿嬪揸背囊，緊揸緊摺佢打嘴鼓，佢問：「阿嬪，你最想愛麼个？」佢頭磬磬仔應：「佢想轉屋下。」一陣酸酸个味緒衝<sup>3</sup>上佢个心肝頭，目汁忍等毋敢分佢跌出來，行出大門，正順等佢个面頰卵緊流等出……。

<sup>1</sup> 決截：音 gied` zied`；果斷、毫不猶豫。

<sup>2</sup> 活動齣數：音 fad tung` chud` sii`；齣事原意是指名堂、狀況、情形，本文是指活動進行的內容、方式。

<sup>3</sup> 衝：音 chung`；亂竄。

阿公、阿嬪來哩啲！一組同學撻佢兜遠校園，逐隻位所有「小小解說員」摺佢兜做紹介，利用這時節，佢兜煞煞摺在校田摘轉來个菜擇擇啊、洗淨來；先生吩咐切菜个同學愛切幼幼仔，較硬个莖無愛；大家擇菜个擇菜、切菜个切菜、起火个起火，分工合作，兩下半就摺阿公阿嬪个點心準備好哩！佢兜摺老人家撻到安排好个位仔，緊飼老人家食點心，緊聽社服人員摺佢兜講个話，先生感覺著氣氛無麼个著<sup>4</sup>，就行兼頭前去……。

「大哥、大姊，還記得佢無？想佢無？」先生滿面笑容个問，阿公、阿嬪黏時面就開陽起來，還應：「有喔！有喔！」先生摺佢兜譚哆、講笑，過後，先生个話頭一轉，面相變莊嚴摺佢兜講：「其實，你兜个世細乜異有孝，考慮屋下無人好睺顧你，驚你跌倒、愁你無伴，又愛賺來食，無奈何正會送你兜來安養院；大家有緣分共下就愛珍惜，答應老妹，從今晡日開始，逐日快樂來過日仔好無？」有人緊領頭；有人大聲應好；有人流等目汁領頭。睺著阿嬪流目汁，佢个心肝又疾起來了。

參加活動過後，相當了解老人家心肚个寂寞，佢想：這下起勢佢定著愛好好來照顧阿公、阿嬪，有孝佢兜，毋會過應嘴應鼻哩！

<sup>4</sup> 無麼个著：音 mo ma` gai` chog；「著」是指對的意思，無麼个著是指當下氛圍不對勁。

111 年全國語文競賽客家語朗讀文章國小學生組（饒平腔）

編號 5 號

### 【筍蛄】羅紫云原作

「蛄」這隻字係講殼硬硬个昆蟲，像雞油蛄、透屎蛄、金蛄仔、花蛄仔、筍蛄這兜，除了花蛄仔以外，佢兜細時都係雞嫲蟲，但係「筍蛄」有較特別，細時有一息仔像雞嫲蟲，毋過佢無腳，還過斯食竹筍定定，像烏葉竹、綠竹筍都係佢个最愛。

「半天斬竹毋使刀，地下打窿毋用鋤，今年著白衫，明年著綾羅。」這係揣令仔，說明筍蛄个一生，今年著等白衫鑽落地泥肚過冬，明年正著等派頭靚靚个衫出來結婚降子。

有一日，屋下人去山頂改竹筍，家濟仔趕出一隻寶物來，該係當久當久無睺著个——「筍蛄」，國語講「臺灣大象鼻蟲」。背囊頂柑仔色還有烏斑，烏斑較圓个安到笠婆係公个，烏斑較尖个安到遮仔係嫲个，翼胛有烏色條紋，毋想飛个時節，翼會收到翼胛裡肚。肚底烏色，用佢帶鏈條掛鈎个腳溫柔个攬等竹筍，過用佢長長像麥管<sup>1</sup>个嘴筒，慢慢仔剪啊剪仔，一下仔就分佢剪一隻空食竹筍，順續屙卵落去。

無幾久，蟲卵變幼蟲慢慢仔大了，竹筍尾截就分佢利利个剪

仔剪斷跌到竹頭下，佢兜山精个細人仔，透日會在竹頭下鑽上鑽下煞猛尋，係尋著該又大又肥，黃滄滄个「筍笨<sup>2</sup>」，摺筍蛄共下放到火爐堆焗抑係鑊嫲煎，該香香酥酥个美食，發夢想著口水水就會流出來。

另外，筍蛄當好捉，在竹頭下目珠睺往上，竹筍尾係有筍蛄黏等，斯愛摺竹筍遽遽搖一下，佢就跌下來了，毋過佢會詐死，四腳惹天恬恬橫在該，肚底又係烏色，無注意睺就分佢騙過榨。成下運氣好會捉著幾下隻，又七做得提線絹佢个腳，當會飛，細人仔就做得爽到歸晝邊。

恁多年來，屋脣个竹筍條條就出尾<sup>3</sup>，盡少睺著佢个身影，佢緊怪怨自家係毋係摺筍蛄食絕忒了，好得又睺著佢，佢開容笑面翕下佢个特寫了後，煞煞摺佢捉到竹園肚去分佢自由生活，希望佢煞煞傳宗接代，開枝散葉。

<sup>1</sup> 麥管：音 mag guan`；吸管。

<sup>2</sup> 筍笨：音 sun` bun`；筍蛄的幼蟲。

<sup>3</sup> 出尾：音 chud` mui`；竹筍有完全長成，無斷尾，表示沒有筍蛄咬過，沒有筍蛄出沒。

111 年全國語文競賽客家語朗讀文章國小學生組（饒平腔）

編號 6 號

【 佢曉搵手囉 】 廖惠貞原作

佢在屋下座大，阿姆講：「最大个愛有好樣。」所以佢輒常渡等老妹共下學習摺搵手，阿嬤講：「有緣正共家門，一屋下人愛共心。」所以佢當聽話。

佢生到壁山恁高，毋過佢今年正十空歲定定，還係細人仔。屋下个世大人有四儕，阿公、阿嬤、阿爸摺阿姆。佢睺世大人歸日愛上班賺錢，日日做到兩頭烏，還辛苦哪！細人仔當然愛多學做兜事情較好哪！

從細佢就好在灶下睺阿姆煮食，佢從一年生開始，就會搵手。阿姆煮菜佢煮湯，兩儕人歡喜鼻香，七手八腳菜就上桌，阿爸講佢恁乖，老妹摺佢拍手，佢越學就越快樂！佢乜盡好珍阿嬤去市場，市場係鬧熱又心色个所在。做得認識當多東西，尤其係青菜，像苦瓜摺黃瓠愛掛皮煮，菜瓜摺瓠仔愛刨皮，芹菜愛食莖，番薯葉、芥蘭菜葉仔摺莖全做得食，笏瓜洗淨就食得，蔥仔、蒜仔仰般分，這兜全係在買菜時學著个。

逐日除忒微毛末節，像：抹地泥、撿摯、收衫褲這兜个搵手，佢還會學煮飯。有一擺，阿姆出門，阿嬤異愁慮，佢講：

「阿嬤！毋使愁，當晝佢來煮。」米洗好，放入電鑊煮，堵好有一鑊爇肉<sup>1</sup>，佢放到瓦斯爐用溫火暖燒，佢續等煎卵包，炒一盤薤菜，還煮一鑊包粟湯，阿姆教過佢煮湯愛細義，毋好燒著！佢還放香菜仔鼓香，兩下半就喊老妹擺碗箸，喊阿公、阿嬤食飯！阿公、阿嬤講佢：「佢慧孫女大囉！恁慶！」佢試著異沙鼻！

佢去到學校乜會搵手，因為佢係「細先生」。睺先生歸日無閒泊杈，愛改一堆个簿仔，所以佢會摺先生搵手，當晝頭就無歇睏。提等紅色个筆，目珠擘金金檢查同學个簿仔，毋著个就用紅筆箍起來，再過請同學改正來，又順續教一下毋會个人，恁样个工作佢毋會慄，感覺有摺同學搵手。

有一句話講「多學多得」，正經哦！佢學著當多，感謝世大人分佢機會又信任佢，佢會繼續學習，佢會煮飯囉！

<sup>1</sup> 爇肉：音 kong` ngiug`；紅燒肉。

111 年全國語文競賽客家語朗讀文章國小學生組（饒平腔）

編號 7 號

【香菇】徐姿華原作

最惜佢个細阿姨年初結婚，姨丈屋下種香菇，有當大片个香菇寮，阿姨湊佢兜去寮，順續去菇寮剪香菇，佢講親身剪个菇特別好食；一溜斯好食香菇个佢，分阿姨怎樣一湊，佢就越想愛去，總係緊嚟阿姆，愛佢渡佢兜去體驗剪香菇。

阿姆斯安排一擺中部探親旅行，俾晝邊仔佢兜斯到細阿姨屋下了，親家且姆當熱情，又泡茶又切水果招待佢兜，當晝係當特別个香菇大餐，各式各樣个菇料理，有萋萋个香菇炒肉絲、洋菇炒荷蘭豆、木米炒黃梨、焗到金黃香酥个金針菇、用幾下種菇煮个湯，清甜个香菇雞、鹹香个三杯杏鮑菇，還有鹹豬肉、炊魚膠炒青菜，十分豐沛。

食飽晝，大人在屋肚坐寮、打嘴鼓，佢兜細孺斯在禾埕走相逐，跳上跌落、爽到汗流脈絡；阿姨兜出冰涼涼个梅湯分佢兜止渴，該冰冰甜甜還合酸丟酸丟个梅湯一落嘴，哇！實在還爽快哪！

姨丈提幾隻篩仔膠剪刀分佢兜，講愛帶佢兜去剪香菇，香菇寮無異遠，行路五分鐘斯到了；佢兜細人好擲擲走等落去，想愛

搶打先，姨丈遽遽喝佢兜，愛先聽佢教仰般剪菇，正毋會爽忒旨好摘个香菇。

一行入種香菇个所在，兩片脣膠大人差毋多高个鐵架，排湊湊張等有機樹屑个塑膠盞，盞嘴綻當多細細金黃色个珊瑚菇，另外一析係種咖啡色个柳松菇，較矮个架頂係歸片个杏鮑菇，還有一區係擺在地泥个太空包，種个係秀珍菇膠金針菇；俾山該向个壁頂，憑等歸大排種香菇个樹筒，姨丈講用樹筒種出來个香菇香氣足，做得賣較好價，毋過較難照顧。

恁大片个香菇寮，睭起來當淨俐相，間十過分鐘斯會噴一到水霧，採光足、通風好，忒寒、忒熱也做下有控制，原旦親家公用傳統方法來種菇，姨丈將現代科技運用在香菇寮肚，事頭變輕鬆、收成還較好，實在無簡單。

佢兜照姨丈个交代，細心細意剪菇，無幾久逐隻篩仔做下張湊各色各種个菇了。愛轉屋个時節，姨丈還送分佢兜有菇菌个太空包，愛分佢兜帶轉去練習照顧，佢講晨早暗晡愛噴水，一兩禮拜斯有菇好摘了，這等路實在當心色也分人當期待呢！

111 年全國語文競賽客家語朗讀文章國小學生組（饒平腔）

編號 8 號

【蹶山】劉玉蕉原作

天旨光，狗旨吠，阿姆斯特咧！「阿榮啊，好跔起咧，日頭愛出來哩喲！」

「阿珍妹，遽遽著鞋哦，愛出門哩喲！」

天甫甫光，日頭還在該睡，佢兜一屋下斯目擘擘仔起腳行，共下去蹶小中嶺山咧。路狹狹，草面頂个露水旨散，分佢兜个腳徑啊著，斯歸串歸串碾落地泥，一粒一粒金皙皙像珍珠樣，靚到奈毋得！佢心肝肚偷偷恁想：係用佢兜來串一條珍珠骹鍊，送分阿姆戴，毋知幾靚哦！

涼爽个風，一陣一陣吹來，路脣个花花草草，分風吹到領頭拗腰緊行禮，斯像該戲臺面頂，落力表演个大明星共樣。行到山下，老妹湊佢拚輸贏，睭麼人做得先蹶上山嶺頂去。兩儕斯恁樣頭磬磬，麼人都毋認輸，相爭拚往上。佢座大當然輸毋得，歸路毋敢停跔，嚟嚟嘍嘍大氣緊啟，直直拚上山，蹶到山頂，抓等心肝，佢啊跳到硬硬像會恬忒樣！

「哇！山頂个風當涼哪！」睭往下，老妹還在該半山排，佢面頰卵紅啾啾，佢睭下，廟肚个關公都無佢恁紅哦！一張嘴擘啊

擘，又像細狗在該啟氣，實在有罇古董，有罇好笑！

山頂个風，特別清，特別涼爽，風裡肚有東勢果子个香氣，有花花草草个清甜味緒，這風吹著人歸身鬆爽，吹著人透心涼，進前蹶山个艱苦，到這下也做下毋記得咧！樹頂絡食个鳥仔吱吱喳喳，跳上跳下唱無停，草竇个蟲仔毋願輸佢，也唧唧滾應聲。打早，山頂斯恁樣鬧熱煎煎咧！眺望該山下，遠遠个東勢，到今還蒙等一層紗，在濛紗煙肚睡到毋知好醒呢！

「遽遽，大家睭！還靚哦！」

東片个雲像點胭脂个樣，紅霞紅霞，紅霞退忒，係千條萬條个金色光，對山个背後射出來，無幾久，一粒大火球，斯對山頭跳出來咧，晟到人擘毋開目，晟到濛煙遽遽掩身。日時頭个事頭，對這下正正式起勢呢！

企在山棟頂，佢兜放勢享受打早个光景，登高眺望个開闊視野，分人心情快活，分人知得感恩，感恩大自然送分恁佢恁樣个好環境。阿爸長透講：「早跔起个鳥正有蟲仔好食。」到這下，佢總算體會著這句話个意思咧！